

感症鑑筏

增春署簽

感症寶筏卷之四目錄

傷寒類症

風溫

瘟疫

濕症

霍亂

脚氣

痰症

蓄血

溫熱

春溫冬溫熱病同治

暑症

中暍同

濕溫

晚發

虛煩

傷食

痧穢



感症寶筏卷之四

傷寒類症

內經云。熱病者。皆傷寒之類也。蓋六氣爲病。皆能發熱。風寒暑濕燥火六因。無不化熱。故善治傷寒者。必能窮究六淫之氣。凡溫熱暑濕疫癘之類。傷寒者。無不一一辨晰明白。而施治各當。要知能治類症。卽是能治傷寒。以類症實居感症之八九也。今將類症治法。列於後。庶幾溫熱暑濕之症。不致混入傷寒正病之治。其於感症。思過半矣。

邵評。傷寒症。邪從肌表而入。先表後裏。從六經辨症。用足經藥。辛溫表散。溫熱暑疫。邪由口鼻吸受。宗三焦認症。從手經用。

藥忌用足經辛溫藥如此溫暑與傷寒方不相混。

風溫

凡天時晴燥溫暖感其氣者卽是風溫之邪（此感而卽發之溫病）陽氣薰灼先傷上焦（從口鼻而受先入肺經）其爲病也身熱汗出頭脹咳嗽喉痛聲濁（肺經見症）治宜辛涼輕劑解之（辛涼宣泄上焦肺經）大忌辛溫汗散（與傷寒不同法）古人治風溫有萎蕤湯知母葛根湯內有麻黃羌活等藥皆不可用（辛溫散表故不可用）

風溫吸入先傷太陰肺分右寸脈獨大（右寸肺脈也大爲邪熱）肺氣不舒身痛胸悶頭脹咳嗽發熱口渴（上焦見症）或發痧疹（邪

由肺而外出皮膚。主治在太陰氣分。梔子、桑杏、萸皮、牛蒡、連翹、薄荷、枯芩、桔梗、桑葉之類。輕宣上焦肺分熱邪。辛涼清散法也。清之解之。痰嗽加貝母。清痰止嗽。聲濁不揚加兜鈴。宣肺瀉火。火盛脈洪加石膏。清肺胃火熱。咽痛加射干。利咽化痰。飽悶加廣鬱金、枳殼。開痞化邪。乾咳喉燥加花粉、蔗漿、梨汁。生津化熱潤肺止咳。咽喉鎖痛加萊菔汁。滌痰下氣。如發熱口糜氣穢者此溫邪劫傷肺胃之津也。宜生地、石膏、知母、麥冬、花粉、銀斛、梨皮之類主之。邵評溫邪由肺而入於胃。熱傷肺胃之津。病在上中二焦。故用大清肺胃熱邪。生津潤燥爲主治。上中二焦之良法。

如肺脹喘急胸痛氣穢者此溫邪傷肺欲釀內癰也。急用活水蘆根

桃仁、苡仁、栝蒌皮、冬瓜子、北沙參、黑元參、連翹之類清之。

邵評：熱邪蘊於肺中，鬱結不宣，氣滯血瘀，欲釀肺癰，故見胸疼、喘急、痰氣穢臭之症。用千金葶藶湯宣肺痺而行血降氣，加味以清化肺熱爲治。

凡風溫上受爲手太陰輕症。若犯手少陰厥陰二經，當於溫熱症內合參之。

以上是感而即發之冬溫。

邵評：以上邪初在肺，其勢尙輕。若肺邪不解，傳入心營及心包絡，經則入裏而病重矣。後溫熱症內所列各條治法相通，當合參之。

溫熱 春溫冬溫

熱病同治 叅葉案

煩勞多慾之人。陰精久耗。適遇冬月。非時之暖感。而即病者。冬溫也。
(冬受冬發者。冬溫也)春時木火司令。天道溫暖。新邪引動。伏邪溫
從內發者。春溫也。夏令炎熱感之。即病壯熱煩渴。而不惡寒者。熱病
也。大抵溫熱之症。陰精內耗。強陽無制。新邪一觸。則燎原之勢。直從
裏發。故初起。即見壯熱煩渴。口乾舌燥等症。而主治以存津液爲要
旨。凡遇傷寒過經不解。或發汗不徹。反致昏劇者。皆溫熱誤治之症
也。(溫熱病而用傷寒治法。延久變重。故曰溫熱誤治之症)前陽明
少陽條內。已見大意。而茲專以手三陰立言。(溫熱宗手經治故以
手三陰立言)治宜互參。

邵評冬不藏精。春必病溫。陰虧是溫病之原。故治溫熱病。以保
陰存津爲首務。若春溫夏熱二症。亦俱有之。冬月受邪。伏藏
不發。至春時天暖。外感時邪。引動伏邪而發病者。名爲伏氣。
春溫。若其人內無伏邪。春天感受溫邪而即病者。此即發之。
春溫也。夏令受熱而即病者。此即發之。熱病也。內有伏邪。春
令不發。至夏至後壯熱而病者。此伏氣所發之熱病也。如此
辨症。方可明晰。內經曰。冬傷於寒。春必病溫。先夏至日爲病
溫。後夏至日爲病熱。溫病發出之途。自少陽。熱病發出之病。
由陽明。溫病主以黃芩湯。熱病主以白虎湯。至於傷寒延久。
邪已化熱。與溫熱治法相通。所謂傷寒與溫熱始異而終同。

也。

又評、伏氣所發之溫熱病。與感而即發之溫熱病。見症稍異。伏氣之病。其邪從裡而達於外表。上無邪。故初起。即熱無一毫惡寒之象。即發之溫病。邪由肺受。肺主皮毛。故初起微寒。繼即純熱不已。如此辨認。庶無錯誤。

手太陰氣分

凡溫邪入肺。症見頭疼惡寒發熱。口燥舌乾。治宜辛涼輕劑。梔子、薄荷、枳殼、黃芩之類。或加前胡、蘇子、象貝、羚羊角之類。（理肺降熱）脈數、胸滿、氣喘（肺火上升）治宜辛涼輕劑。梔子、薄荷、枳殼、黃芩之類。或加前胡、蘇子、象貝、羚羊角之類。（理肺降氣化痰清熱爲治）

邵評此受而即發之溫熱病。首先入肺。肺主皮毛而在表。故見表症。宜辛涼輕清以宣泄上焦肺衛之邪。

手少陰營分

溫邪吸入由衛及營者。其舌先白後絳也。或竟入營分。則舌必絳。赤或紅中兼微白。夜煩不寐。神呆譫語。宜犀角尖鮮生地淡竹葉麥冬連翹石菖蒲川斛丹皮之類。兼痰者加川貝母大竺黃之類。一滌痰清火之劑。

邵評此承上條由衛而入營亦受而即病之溫症也。白胎邪在肺衛絳胎邪入心營。自衛入營故舌先白後絳。深紅色也。紅中兼微白氣分之邪未盡也。若熱擾心營則神蒙不能自

主上條邪在肺衛。其病尙淺。此條由衛及營。邪氣自外入內。其病較深。下條溫邪傳入心包絡中。痰潮內閉。其病尤深。此皆受而卽病之溫熱症。宗心營肺衛主治。故以宣營清熱達邪一法。

手厥陰內閉

如溫邪傳於膻中。卽干心包。絡痰潮內閉。則神昏譫語。舌胎純紅起刺。純紅起刺。包絡邪火舌也。此重症也。急宜清心開閉。用犀角、連翹、川貝母、天竺黃、廣鬱金、石菖蒲、淨銀花、鈎藤鈎、西黃之類主之。邵評：膻中爲心之宮城。邪入於此。干犯心包。熱逼心中。挾痰濁互結。致神昏譫語。而邪陷內閉。內閉則外脫。正不勝邪之候。

也。宜清心化痰。開閉達邪之法。再加芳香宣竅之品。如紫雪至寶丹之類。尤妙。

以上三條。感而卽發之溫熱病。邪由口鼻吸受。先入肺衛。由肺傳入心營。甚至逆傳入心包。自外入內。一層遞深。一層三條當合參之。

溫邪却液

如發熱不退。燥乾胃中津液。以致口糜。氣穢。當用甘露飲玉女煎之類。

邵評。熱久陰傷。灼乾胃液。不拘伏氣溫熱。與受而卽發之溫熱。俱有此候。口糜。氣穢。陰虛火旺也。二方滋陰液。以清胃火。爲

治。

熱久煩渴少氣竹葉石膏湯效兼腕中痞悶不肌（胃中有痰熱內滯也）加廣鬱金汁茄楠香汁各二匙冲。

邵評中虛胃熱而作虛煩用養正清胃除煩降火爲治。

足厥陰液涸

若溫邪誤治邪必深入厥陰神昏音澁舌絳裂紋欲寐不寐午間煩躁（肝火內擾則煩躁不寐）形象畏冷心中如焚（熱極似寒則內熱而外冷此肝火極旺之候）此正氣久虛陰液已涸宜復脈湯加減如生地麥冬炙草白芍陳阿膠丹皮梨汁童便之類（此伏發之症誤治而邪入深沉之救法）

邵評溫熱誤治。邪入極深。陷於肝經。肝屬木而有火。木火內燔。陰液枯涸。液涸風動。故見症如此。故用滋陰液以清肝火。爲治。

邪氣干血分

風溫之邪入於營分。不解以致舌赤音低神呆潮熱脈數左甚或發丹疹。此邪過營而已及血分也。夫心主血邪干血分漸成內閉風藥燥血固宜大禁。卽苦寒直走腸胃亦非溫邪逆入臍中心主所宜須犀角元參鮮生地廣鬱金石菖蒲丹皮銀花西黃之類主之。

邵評邪初入肺則在衛。不解則入氣分。氣分不解則傳心營。營不解則入下焦血分矣。邪在血分入裏極深中焦俱病陰液

受戕每多液涸內閉之候宜救陰達邪清營涼血治之至於
臚中是包絡所居在於上焦用藥宜清輕而忌重濁此種藥
味治邪入心包之劑若入血分當用地黃阿膠復脈湯方是
血分治法

氣血兩傷

若感溫邪治不中的熱毒內燔必至氣血兩虧如脈左數右大（數
爲虛大則爲火）煩渴口糜舌赤唇焦（陰虧火盛之候）是也宜玉
女煎

邵評溫邪誤治熱入陽明灼傷少陰陰液此少陰不足陽明有
餘病在中下二焦也宜滋腎陰以清胃火

邪結上焦

溫邪從口鼻吸入。則上焦先受。氣血與熱邪混處。膠固必致清竅不利。凡寒熱後。頤頷腫脹。邪結少陽陽明。咽喉疼痛。牙關緊閉。邪結上焦。肺衛清竅阻閉不通。脈左小右搏指者。營血滯滯則左脈小。邪火內盛則右脈搏指。皆邪結上焦所致也。當照疫症施治。宜連翹、牛蒡、射干、馬勃、滑石、銀花、赤芍、薄荷、夏枯草、人中黃之類選用。此由天行時毒而病。故當照疫症施治。用宣散溫邪清火解毒之法。

邵評：溫熱疫毒。口鼻吸受。蘊結上焦。不得宣散發。爲大頭風毒。頤腫咽痛等症。此溫邪兼風毒而成。治宜清熱解毒之法。